



Meeqqanut pinerliisimanginnermut uppersaatipt imaa annertusillugu meeqqanik atoqateqarsinnaanngorsimasunik kinguaassititigut pinerliisimanerit ilanngunneqartalernissaat pillugu Kalaallit Nunaanni Meeqqanut pinerliisimanginnermut uppersaammut malittarisassat allanngortinneqarnissaat siunertaralugu naalagaaffeqatigiinni oqartussaaffinnut saaffigineqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Allanguinerup peqataanik Namminersorlutik Oqartussat meeqqanut pinerliisimanginnermut uppersaammik piniarnissaminnut pisussaaffeqarnerat annertusineqassaaq inuit meeqqanut oqaatigineqartut ukiulinnut attaveqartartussanngorlugit atorfinittussat imaluunniit sullissisussat ilanngunneqarsinnaanngorlugit.

(Inatsisartunut ilaasortaq Steen Lyngé, Demokraatit)

(Siullermeeneqarnera)

Siullermik Demokraatit sinnerlugit Inatsisartunut ilaasortaq Steen Lyngé qujaffingerusupparput siunnersuummik pingaaruteqaqisumik siunnersuuteqarsimammat.

Demokraatit nuannaarutigivaat Naalakkersuisut siunnersuummut tapersersuimmata. Maannali naammassillugu inuiaqatigiinni meeqqanik 18-it inorlugit ukiulinnik illersuinissaq pisariaqavissorpoq. Siunnersuut allaqqasutut inatsimmik allanguinermi Meeqqat pillugit Isumaqaatigiisummi artikel 1-imut tulluussarnerusaaq, tamannalu soorunami tapersersorparput.

”Meeqqat siunissaraagut”. Oqaaseqatigiit taakkua alliaartorninni qasseriaq tusarsimanerpakka. Taamaakkaluartorli uanga ikinngutikkalu ilisimasanik uloriarnartunik nipaarsaarussinermik annertuumik misigisaqartuarsimavugut. Ilisimasat eqqunngitsut ulluinnaarsuutaaleraangata, eqqumiittorpassuarnillu peqquteqarlutik eqqartorneqarneq ajoraangata ulorianarsisarput. Tamaalilluni inuttut atugarisanik kingornussat ajortut ingerlatiinnarneqartarput.

Qujanartumilli pilersarusiat kingulliit, inuiaqatigiinnilu paqumigineqartunik ammasumik eqqartuisarneq siunissamik qaamanermik neriuuteqartitsipput. Tassuunnakkullu angajoqqaat, inersimasut, peqatigiiffiit suliffeqarfiillu il. il. meeqqat illersorniarlugit sassartariaqarlerput. Taamaammallu siunnersuut manna piffissamut-naleqquttumut-siunnersuutaavoq, tamakkiisumillu tapersersorparput.

Nunatsinni meeqqanik atorerluisimanerit nalunaarsorneri amiilaarnarluinnarput, uagullu aalajangiisartuusugut maanna pisumut malunnaatilimmut ingerlalluannngitsumut iliuseqartariaqalerpugut inuiaqatigiinnullu uppersarlugit meerartatsinnut inuusuttortatsinnullu akisussaaffimmik tiguserusullutalu tiguisinnaasugut.



Tamanna tamatta isumaqatigiiffiginnaagunarpaput. Demokraatit matumuuna siunnersuut akuerineqarnissaanut innersuuppaput.